

Lugar pa staciona trailer ta bay segun sorteo via tombola

ORANJESTAD(AAN):Durante conferencia di prensa na Hulpbestuurskantoor na Noord, Sr.Dudu Adonis di Domeinbeheer a splica cu pa permiso pa staciona trailer canto di ruta di carnaval, e applicantenan mester

manda esaki aden riba papel di stampia di 4 florin.

Ta acepta un peticion pa persona y e persona aki mester identifica su mes dia di busca permiso y mester tin e permiso y su identificacion na e trailer pa



ora di controlnan.

Despues cu haci peticion, esakinan ta bay den un buzón na Domeinbeheer, cual buzón ta keda sella pa notario.

E peticionnan por ser haci entre dia 10 pa dia 16 di Januari na Domeinbeheer.

Dia 16 di januari anochi e buzón ta bay Tele Aruba unda pa 9.45 or lo tin sorteo pa saca e 300 hendenan cu ta haya permiso y

25 adicional como extra pa si en caso despues tin hende cu ta cay afo.

E peticionnan ta bay den un tombola y lo saca esnan cu ta haya oportunidad pa escoge sitio pa staciona nan trailer.

Den e mes secuencia cu saca e nombernan, e personanan aki lo mester acudi despues na Domeinbeheer pa escoge nan sitio pa staciona trailer.

E lista di esnan cu a wordo escogi y nan secuencia lo wordo publica e dos dianan siguiente.

Sr.Adonis a splica cu pa haya un parcela di 6 meter ta paga 75 florin, pa un trailer cu ta tuma 12 meter di parcela ta paga 250 y pa 3 parcela, mas o menos 18 meter ta paga 500 florin.

Riba e permiso cu ta ser duna ta stipula estrictamente cu no mag traspasa tereno pa otro hende.

Esta cu esnan cu haya e permiso no mag pasa esaki pa otro hende ni bende.

Na Domeinbeheer despues di sorteo lo stipula fecha pa esnan cu a haya un parcela por bin haci e tramitenan necesario.

Pa dia lo atende 60 persona.

Diario. - (8 januari 1991)